



Comun di Cjopris - Viscon

La publicazion di “Cjopris e Viscon – I nons dai puescj” e cjamine sul troi che il Comun al à cjapât cun chê di tignî cont dal patrimoni orâl de nestre int che, se nol fos cui che lu met par scrit, un pôc in di al larès pierdût, parie cul distudâsi dai viei che lu àn puartât indevant fin cumò, fin a disfantâsi dal dut.

L'intindiment prin dal progjet pe toponomastiche, che al à viodût denant di ducj l'Istitût pe ricereje e la promoziun de civiltât furlane “Achille Tellini” e i siei colaboradôrs, ancje cul sostegn de Comun di Cjopris – Viscon, al jere chel di sburtâ a racuei e a studiâ i nons dai puescj par capî ce che a vuelin dî, d'indulâ che nus vegnin e di ce tradizion, par fâju cognossi e ancje, parcè di no, tornâju a doprâ.

O podìn ben dî che chest libri, e il mût che al è stât rincurât, in plui di fânus cognossi biel avuâl il teritori dal nestri Comun al è un bon imprest par capî miôr il mont contadin e la straordenarie ricjece di espressions e ancje di fantasie dai nestris vons, che a rivavin a dâi un non precîs no dome a di une grande vastitât ma, daspès, ancje ai cjamputs plui piçui che, salacor, i nons ju cognossevin dome chei de famee che ju lavorave e pôcs altris.

Duncje, cence pôre di falâ, si po dî che la toponomastiche, peraulone che e stâ par “i nons di un puest e il studi di chei nons” o ben, ancjemò miôr, i nons stes a son, dutune cu la lenghe, lis tradiziuns e lis usancis fintremai al mût di fâ sù lis cjasis, une des robis che a identifichin pulît une tiere e il popul che i cjamine parsore, cu la sô storie e la sô culture vignudis fûr dal messedament des storiis e des culturis dai popui che sun chê tiere a àn vivût.

Al è juste apont par chescj motîfs che il Comun al à pensât di sostignî cheste publicazion, savint ben che se ciertis robis no vegnin “fermadis” tal scrit o pierdin no dome une grande part de nestre storie ma ancje dal nestri mût di jessi, de nestre anime, lassant daûr di nô un mont plui puar.

Ancje chest libri nus jude a ricuardâ cui che o sin parcè che “se no si sa d'indulâ che si ven no si sa dulâ che si va”.

Il Vice Sindic e Assessôr pe Culture
Galliano Zucco

Il Sindic
Carlo Schiff